

տարաններու կտաւներն (շուշպայ) այնչափ շատ են, որ հազիւ մի ժամից մարդ կարող կը լինի բանալ:

Ոմանք շահու ազբիւր դարձուցած են այդ Ս. Գիրքը, որի համար եղբարց մէջ շատ անգամ կոխ յարուցուած է իւրացնելու:

ԿԱՐՄԻՐ ԱԻԵՏԱՐԱՆՍ. — Վաղարշակերտու «Գաւիթի տան աւետարանն» շատ հին մագաղաթեայ աւետարան է, տեղացւոց մեծ երգումը «Գաւիթի տան աւետարան»ի վերայ է:

Այս աւետարանը շատ հին է՝ դժուար ընթեռնելի. տեսնողներէն ոմանք Ս. Մեսրոպոյի ժամանակից գրուած կը կարծեն. ունի աւետարանի գրով գրուած մի ընդարձակ յիշատակարան. շատ աշխատած եմ որպէս զի տեղեակով կարողանամ կարգալ, չեմ օրինակած, յուսալով որ աէրը թոյլ կտայ երկար օրոճամ ու գրի առնեմ, սակայն աէրը չգիջաւ, մեծ հատուցում պահանջեց:

Գրած եմ միայն մի քանի յիշատակարաններն՝ որք վերջի դարերուն կը պատկանին:

Կարմիր Աւետարանի կողերն արծաթապատ են. արծաթեայ շղթաներով: Արծաթի վերայ գեղեցիկ պատկերներ փորագրուած, որ տեսնողին պատկառանք կազդէ: Փորագրուած է Քրիստոսի խաչելութիւնը, երկու կողմերն երկու Մարիամներն կանգնած՝ խաչին կը նային, խաչի ոտի տակ Ադամայ գլխի կմախքն, գլխու երկու քովերն երկու հրեշտակներ ձեռքերնին երկու սկիհ՝ որք հոսած արեան կաթիլներու տակ են բռնած. գլխու վերեն արծաթը քառակուսի դուրս ցցուած, որոց վերայ ունի փորագրուած «Յ. Մ. Թ. ՀԹ.»: